

OMUKUETU

NO:1

Januarie

1956.



LONGA IILONGA MBOJOTANGO

Otatu tameke omumvo omupe natango. Itatu tseja nando sha nuumvo tagu tu etele shike. Pamue tatu mono uupjakadi u vule uomumvogu, nenge pamue tatu mono omumvo omuuanaua guombili nelago.

Omuntu kehe ngele ta tala komeho ta tegelele elago. Pecimbo ndika aantu ngele taa tala iilonga jauo, taa mono pamue iilonga jomumvogu iuunaji shili. No taa tokola: nuumvo otandi kala nomikalo omuuanaua niilonga ji vule mbijaka jonaale. Ihe etokolo ndika itali ku kuaca.

Onaua ngele tatu mono uuinaji uomuntu nuuinaji uetu jene. Oku na aantu oje ndji taa diladila ngame mondjila inandi longa iilonga iuunaji nando. Ojo je li ngashika omuntu guoku Laodikea kungoka Omuaa ta ti: „Oshoka to ti: Ongame omujamba, eeno ongame omujambelela. ndaa na sho nda pumbua, no ku shi shi ongoje tuu omukueji, ohepele, omutokele, omuposi, no ua kala olutu louala.“ Omuntu nguka iti itseja oje muene, oje ta mono oshiponga. Oje ti ipukica.

Otatu pumbua shili tu ipule ediladilo ljOmuaa. Pamue to mono elaka ljoku Efeso kungoje: „IHE ONDI NA TUU OHAPU NA NGOJE, SHO UA ECA OHOOLE JOJE JOTANGO.“

Pecimbo ljepapuduko omagongalo getu ga mona aantu oje ndji johoole jotango. Ojo

ja hempulula Jesus. Ojo ja jakula aakuauo nohoole ompé. Ojo ja pulakene oohapu dOmuaa nenjanju enene. Ojo ja indile esiku kehe, no ji imbi omaimbilo gehambelelo omolu uuanaua u'Omuaa Jesus. Ombinzi ja. Jesus Kristus ja jelica omitima dauo, nOmbepo Ondjapuki okua kala moomuenjo dauo. Ojo aanelago. Ojo aantu johoole jotango.

Ihe ngashingeji, to mono tuu natango iilonga mbika johoole momuenjo guoje? To kala natango mohoole jotango? Omuaa Jesus ta pula petameko ljomumvo omupe tu ikonakone okuipulapula ngele tu li natango mondjila. Pamue elaka ndika li li elaka uo kungoje: „Ihe ondi na tuu ohapu na ngoje, sho ua eca ohoole joje jotango.“

Okumona oluhapo nduka kua li etameko ljeitedululo. Tu pulakeneni ano ekumagido ljoohapu dOmuaa: „DIMBULUKUA ANO MOKA UI ITEKA MO, NGU ITEDULULE, NGU LONGE IILONGA MBOJOTANGO.“ Ino diladila itandi pumbua elaka ndika ljeitedululo, aue, otse atuhe tatu li pumbua. Okupulakena nokuninga shoka tu uuvu.

Pamue omuntu gumue ta diladila: Elaka ndika euanaua shili, ihe onda li ndi nokukambadala omumvo kehe no inandi mona iijimati iuanaua nando. Kandi na oonkondo okudiginina natango. Ondi ihata pevi oluindjiluindji, Omuaa Jesus ita vulu ue

okudima omapuko gandje

Eeno, ou li mondjila. Eididimiko lja Kalunga itali tsikile sigo aluhe. Omuti ngo itagu iimi otagu kuca ouala evi oonkondo, nOmueene guoshikunino te gu ke po. Kaantu oje ndji omumvo nguka omupe, omumvo guahugunina. Ecimbo ljesilohenda tali hulu po. Kaantu oje ndji ecimbo ljeicano lja Kalunga efupi li vule ecimbo ljokukala nomuenjo.

Ihe ngele to kala nomadiladilo ngaka guudigu, to mono elaka etoje kungoje. Omuaa Jesus muene te ku galikanene ku Kalunga: „Omuaa, gu eca manga numvo, manga tandi gu helele no tandi gu tulile uuhoho, pamue tagu iimi tuu omumvo tagu ja.“ Moohapu dika tu uuvu eui ljomusita omuuanaua ta kongo, ta kongo sigo ta mono onzi je ja kana.

Tu hambeleleni ano Kalunga omolu evangeli tali uuvicua natango mokati ketu. Tu hambeleleni Omueene guoshikunino omolu omusitagongalo, omuevangeli nolumongi kehe ta mono natango oonkondo nesilohenda okuuvica elaka ljenjanju nuudiginini. Tu hambeleleni Omuaa guesilohenda omolu omasakramenti tatu ga mono natango. Tu imbeni omaimbilo gepandulo oshoka oohapu da Kalunga di li natango mokati ketu. Ombimbeli, okambo kehe taka njanjangidua, oshifo shika shetu „Omukuetu,“ iinima mbika ajihe taji hokolola Omuaa Jesus ta longo moshikunino she natango; oje muene ta helele no ta tutile uuhoho okumona iijimati.

Ihe opo tu iime, tu nokupulakena ekumagido ndika: „DIMBULUKUA ANO MOKA UI ITEKA MO, NGU ITEDULULE, NGU LONGE IILONGA MBOJOTANGO.“ Longa iilonga johoole no to longo iilonga ja Jesus, no to kala mohoole je. To kala mu Jesus na Jesus ta kala mu ngoje, ngashi oje muene ta ti: „KALANI MU NGAME NA NGAME TANDI KALA MU NE. ONGASHIKA OSHITAJI KASHI VULU OKUIIMA MUSHO SHENE, NGELE ITASHI KALA NOMUVINU, NOSHO NANE UO NGELE ITAMU KALA MU NGAME. ONGAME OMUVINU, ONE IITAJI. ONGOKA TA KALA MU NGAME NA NGAME MUJE, OJE OTI IIMI OSHINDJI; OSHOKA MUA NA NDJE KAMU VULU OKULONGA SHA.“

E. H.





Januarie 1956.

OMUMVO OMUKULU.

Omumvo 1955 okuza kuokuvalua kua Jesus Kristus oqua ji guo itagu ka galuka ue. Otatu vulu ashike oku gu dimbulukua momadiladilo getu, tu tale shoka sha li mo.

Okudiladila oshiguana ashihe shaauambo otu nokutja, osha kuatakanicua naua niiguana iikuauo jokuSuid-Afrika ketalelopo ljaapangeli aanene. Iilonga ojindji jiitauua nojoondama oja holola uo ehalo ljepangelo ljokusila Ouambo oshimpuiju. Kombinga jimue okua holoika uo kashona, nkene auuambo inaa putuka natango naua miinima jepangelo, ja tseje, nkene je nokuendica oohapu dauo kaapangeli. Okuaaputuka kua tja ngaanga okua halakanica nokuli oshigongi shontumba.

Ongerki onkuaevangeli jopaLuther mOuambokavango oja tsikile natango oshilonga shajo oshinene shokuiucila omikalo deipangelo. Oja peua uo ompito okumonacana noongerki onkuauo onkualutheri moshigongi oshinene shokuMarangu. omadidiliko ga tja ngaaka gokukoka kuongerki jetu oge tu njanjuda. Kombinga onkuauo okua dimbululua uo ompumbue jeputudo nojomapukululo, opo aasitagongalo naajakuli jalue jongerki ja uape okuguanica naua iilonga jauo iikulu niipe.

Ligongi ajihe jilongo nojoongerki ojo iinginganima iishona, nge taji jelekua neholoko ljOmbimbeli joshindonga. Oshinima shoka oshinene otashi popiua uo palue moshifo shika; onkee otatu shi tumbula mpaka pafupielela. Kehe ngoka i imonene Ombimbeli na tale naua, embo lje lja hepe ouala. Oli nokuleshua oluindji nokuleshua ojendji.

Ajehe mboka je noshimpuiju sheputudo ljaauambo, oja popi oluhepo olunene kombinga ndjoka. Aakuluntu ojendji oja suunje okutuma ojana momanongelo. Une ne aamati oja ecelua noji iecela muugoja uokuaalongua sha. Noshu uo eputudo ljomomagumbo olja suunkundi. Ojendji oja njengua okujoolola pokati koondunge neputuko. Auuambo ngele itaa itedulula miinima mbika, nena oshiguana ashihe oshi nokuja momapijagano nomiiponga.

Onkene tuu Mbepo gua Kalunga okua tsikile uo oshilonga she oshiuanaua komavi ngaka getu. Otu nokuhambelela Kalunga omoluanaua mboka tue u mono omumvo 1955 noku mu indila, oje a dime po oondjo detu je e tu jambekele omumvo nguka omupe guesilohenda.

EKUNDO LJAAKULUNTU JEHANGA-NOTUMO.

Omukuluntutumo Olavi Vuorela nomuulikihapu gueuilikongundu ljehangantumo ljokoSoomi Dr. Mikko Juva oja njolele aatumua ajehe ekundo ljoKrisimesa moka ja ti uo ngeji:-

Okukala kuetu noshilonga shetu otashi ciminikua oluindji kompango ndjika: ondi noku shi guanica, otandi shi pulua, oshilonga shandje osho sha manga ndje. Oluindji otua vulua komitenge dika notatu



Omukuluntutumo Olavi Vuorela.

ti: kandi na ue oonkondo, onda njengua, itandi shi vulu.

Okrisimesa otaji tu uuvicile evangeli ljemangululo. Oljo nali tu mangulule uo miilonga mbjoka jopampango. Otatu pitikilua okupulakena elaka ljOmukulili pamue naasita. Otatu pitikilua okucika kuje pamue naakoneki. Otatu pitikilua oku mu hambelala pamue naajengeli. Ashihe shika osha ningi shetu. Omagano ngoka Tate guomegulu te ge tu pe ogo omaganoeleia, itaaga pula sha mutse.

Otatu mu halele evaluluko ljomeni nenjanju lja guana ljomevangeli."



Omukulukadi guomukuluntutumo, efolo Kaisa Vuorela.



Omboka je tu tumine omakundo gOkrisimesa, ojo mboka, ihe peha ljefolo Saarinen opu nofeilaini Marja Väisälä.

OSHIKOLOLO SHOMEGUMBO



OMIKALO DOMOHANGO.

9.

Iikulunima.

Opua adika uo omukalo ngoka guoku ka tala ko omufuko kaandjauo. Omufuko oba kala a holekua, ngele ombushiki a heda popepi. Noluindji aantu oja undulacana noja tamanana omolua sho. Ehunganeko ndika euinaji shili. Ngele tatu hala oku ka pitula omufuko okuo oshinima oshishonashona mohango. Oje okua li a guana okutinilua ku he na jina, manga chango taji kundacana. Ihe aakuluntu sho ja zimina nombili, inashi opala ue, aahijua

ja hunganekele oondjokana daantu oontamanana.

Nokuli okupitula omufuko otashi ti, opo aafuko ajehe ja cike kondjugo cshita, pua: kala omategelelacano. Ihe ngashingeji aantu ajehe sho ja pukuluka miinima ajihe nomecimbo uo, onaua ngele aafuko taa uvacana ecimbo, opo ja tsakanene kongulu. Ngele ope na ngoka a adika koshiponga shombaa-diliia, ngashi uuvu, oje ta vulu okutumina: omukuauo elaka manga ku jele.

Opua li uo omukalo guokuciga ombu shiki koluaanda. Tse otu shi shi eha lje olja longekidua nale megumbo. Omukalo omuua: aua oguo tuu ngoka, ombushiki a falue komufuko gue pehala lje.

10.

Euvacano.

Moondjokana adihe omu nokuka'a euvacano neinekacano enene. Aafuko jone je nokukotoka, oondjokana dauo di mone etameko euar aua ljeinekelo. Ojo ngele ja kundacana shoka taa ka ninga esiku ljoshituci, naje shi diginine, puua kale ngoka ta jono euvacano. Inashi opala, ojo ja ninge oontamanana melundu, ja hilagulacane. Ji iitekacane, ihe naa iididimikilacane. Oshoka okujona po oshituci kua tja ngeji okuo taku caneke ejonuko ljoondjokana li li komeho. Onkee ano onaua shili, ngele taku jandua oontamanana.

M. Kr

OLUHEPO MIIKOLICA!

Omukuetu omuhoolike, oua dimbulula tuu shili oluhepo nduka omolu iikolica sho to halakanica po ouala iikulja niizalua joje? Oluhepo luatjangeji lua tana, lua ningi olunene moshiguana shetu shaauambo. Nenge ngoje mukueta ku lu uete nande? Oluhepo nduka olua kuata oombinga dika ndatu: a) Omuntu ta mana po iilja je, sho ita vulu okutsilika oshimpako nando oomuedi oo tuu mbali. Omuntu e li ngeji ta njengua okuada nokuli koshikogo manga ina hehela, mpa a ti aniaa uusila uontaku jaanona, (ano ongundo.) b) Omuntu e li ngeji, sho a ningi omupika gua alkohol, ota landica po noonguo de a mone okunua. Aamati ojendji jaauambo kUushimba oja zi ko ouala, ihe omolu iikolica, omumati e li ngaaka okua kaleka aakuluntu je moluhepo, sho taa akulua ouala kookaimbi je he ende uushimba. c) Aantu ojendji ja ningi shili aankundi komalutu gauo omolu iikolica, nenge kuja shi? Iikolica je eta nokuli uuposi uouene. Omukuetu penduka moluhepo ndukee! Ngoje ino ijekelela kuume! Ano uva euvaneko ndika. Rom. 6:11.

Eino Johannes Sakeus.

ETSEJICILO.

Omanongelo getu nkene taga ka longa omuvo 1956.

1. OMANONGELO GAANONA.

Oga hala okuhumica aanona komeho. Aanongekua otaa pulua uudiginini petamekolela nokuli, oshoka pehulilo ljomuvo omakonakono (eksamen) opo ge li.

2. OMANONGELO GAAMATI.

Ogo ngaka: Oniipa, Engela, Eenana, Onguediva, Elim nOmbalantu. Omuvo omutitatu guenongelo oto gu ada mOniipa nomEngela.

3. OMANONGELO GAAKADONA.

Ogo ngaka: Oshigambo, Ontananga. Engela, Ondobe, Omundaungilo, Okalongo, Elim, Niimuandi, nUukualuudi. Omuvo omutitatu guenongelo oto gu ada mOshigambo, mEngela, mu Elim nomUukualuudi.

4. Ooseminaari.

Ndjoka jaamati ji li mOnguediva,
Ndjoka jaakadona ji li mOngandjera.
Ndjoka jaatsikili ji li mOshigambo. (Aanongekua ja hogololua nokuli.)

Aanona na aagundjuka, „Oomboka je shi kulombuelua, ojo je nocndunge.“ Omajelet. 13:10.

Indileni ngeji: „Omuua, ulukila ndje epola ljoje.“

Ps. 86:11. Nenge ngeji: „Omuua, tsejicila ndje oondjila doje.“ Ps. 25:4.

Aanona na aagundjuka, tonateni, ne mu idiliken!

1 Tess. 5:6-7.

Omune lago onguka ta ka mona ompito jokukala menongelo.

Omanongelo agehe otaga tameke iilonga jago.
esiku eti 30 lja Januarie 1956.

Esilohenda ljo muua nali kale kombanda jaanongekua
ngashi jaanongeki uo.

Sylvi Kyllönen.

Oshikololo shaagundjuka.

MUTALENI NAHENDA.



21. Mutaleni a tsikile ihe ondjila je e nombili komuenjo. Ohaluka ouala okue ja kolucicija olushona lu nomeja omatoje, nokua nu mo sigo a kumua.



23. Okua dimbu'ukua omeja ge li popepi. Ihe oshijumi kashi po. Nena a dimbulula egala lja Hanna li li pevi. Olja ningi ihe oshuma shomeja. Ihe tangotango Mutaleni a siikile omutse'gua Hanna noshiteta. Okacimbo kouala a galuka kolucicija e negala ljuuda omeja omatalala.

EPUKULULO.

Ondi na oluhodi lakula unene lva-muameme ve li koilongo noilongo. Hava sangele omikanda komaumbo amue manene eli mu Swakop. Ongasi olimue tali ifanua Tippelskirch. Hava kala va hala ko oinima javo okulanda ndele hano ohava sange ne oinima ihe uditike nande. Ngashi ovamati vamue veli mu Oranjemund aluse tava sange ndele kave uditike oshimbulu savo ile osingilisha savo! Hano kombinga joinima jatja ngaha omunhu osima je okue si pumbua sili hano iha dudu oku si tuminua sasi ina sanga naua. Hano paife keshe umue ta pumua sa keumbo eli Tippelskirch na sange osikuanjama ile osindonga, ope handi dudu okumona ejakulo la uana, nje ava inamu enda oushimba natango kondjeni, mu je meefikola, ope muhafa vakueni. Kundueni nombili.

H. R. S. Shiwetha.



22. N'nanju Mutaleni a hu nu komeho. Ihe oshike shino? Monuzile guomuti mua lala okakadona - Hanna. Oka koca. Mutaleni a pula: „Hanna ongiini ano u li huka?” Kape nejamukulo Hanna a tsomuku nomucika.

Mutaleni a haluka nokui ipula: „Ondi nokuninga shike?”



24. Mutaleni okua tsoongolo pu Hanna nokua tilatilile omeja omatalala komutse'gue. Navulua omeho ga Hanna gatona. Oje nokua hokololele Mutaleni, nkene a pukile mo'uti, sho kue ja mo okukonga Mutaleni okahua ke.

AASINDANI JOMECIGACANO ETINE NETITANO.

Aakambadali omo ja li isheue ojendji ngaa. Mboka ja jamukula naua mecigacano etine oja li 59. Ejamukulo lju uuka lja li Job40:15-24. Oshihogolico sha kuata mbaka jaali: KIRENEUS NGHIPUKULA, ONDOMBEJENO na RISTO KUEEDNA, OSHAKATI.

Aajamukulinua mecigacano etitano oja li uo 59, ano Hes.34:3b-12. Oshihogolico sha kuata mbaka: ELISABET NAMUHUJA, ONIIPA na SIMON LOT, EDUNJA.

Kalunga ne mu jambekele no komeho okuleshua kuenu kuOmbimbeli.

Kundueni nenjanju KOMUKUETU.

Kambadala.

OTO-NENE NANI TUULA NDIJAKA MUALA KANA VALA LUTATU LELEKA OMUJENGELI ADIMA KUNA LIKA LILA. Mpaka to mono iitja ja fa kaji nekuatacano nenge kaji noondunge nokuli. Ihe kuca okantoko kotango koshitja kehe noto ka mona ihe etumbulo li noondunge, lja lombuelua kaajengeli. Aasita je li uvu tango.

Kambadala. Elandulacano ljuuntoko u noku li lundulula kashona.

Omaimbilo gaKrisimesa uga shi?

1. No nena te tu kongo.
 2. Nda komdeka keso.
 3. Esiku lje ondi.
 4. U kundue sho a jiile mpa.
 5. Jesus e ja okuminikila.
 6. Moonkandja deso kuca ndje.
- Omatumbulo ngano ga kucua mo momaimbilo gaKrisimesa. U shi omaimbilo gogene taga tameke ngini?

Omajamukulo naga tuminue Omukuetu

EGALIKANO LJOMUKUANIILUA POMUVU.

Omukuaniilua Kambonde (Sheepo) sho e ja mOshaanda (Grootfontein) ta zi ku Windhoek eti 12 November 1955, okua talele po omuvu Hilma Sakeus. Sho e ja mongulu jomuvu, manga inaatu mu popica, okua ti: - Tu tseni oongolo tu galikaneni. - Okua tsu oongolo noonguo de oondjelele polupanda lua guae kua omuti guongaku, nokua galikana.

Mokugalikana kue a tumbula tango: - Omuaa kaku na ngoka e ku fa no kaku na Kalunga kalue, ongoje auike. - Ngashi omukuaniilua David a ningi: Ondjal. jot. 17:20.

Ohugunina okua ti: - Omuya muene guoongundu daakuuta, taamba momakutsi goje egalikano ljangde, amen! -

Omukuaniilua a londeke omuvu nguka moshihauto she nonando ina guana okulonda mo.

Otse aakuanezimo lja Hilma otatu pandula tate Kambonde noku mu halela ejambeko lja nguka guokombandambanda mokukalamuenjo kue akuhe a kale oshiholelua shaalelua je.

Hoolola ou u na okukatela. Hoolola jo nambi u nokuja momudo omupe oo ue uja paife. Ino ja mo noukolue, noulunga, noipala, nomasheko, nomatukano. Ino ja mo nomepo jokudina ongeleki jeni nokutamaneke ovakulu nu voje melundu nomekolondo lomutima. Inda mo netilokalunga nelihupipiko. Etangalalo tali eta ongola ja Kalunga notali njonene omu nu omajambeko omudo ompe. Et lokalunga nelidilululo tali ke ku udifa ehafo. Omukuetu omuholike mu Jesus Kristus, hoolola nene nena ouu na oku mu kalela.

L. Michael, Grootfontein.

OKAANDJETU

OSHININGUA OSHINENE SHOMUVO
OMUKULU



AAJAMBO OJA MONO OMBIMBEL
JAUO.



Mokudiladila iinginganima ajihe jomumo gua ji puua na nando omalimbililo: oshinima oshinene kaauambo ajehe osho okuholoka kuOmbimbeli joshindonga mu-Juni 1955. Moshifo shetu uo omua kala naale oonkundana doshinima shoka shenjanju. Ihe ngashingeji otua hala tu shune natango musho, oshoka otua peua omafano gamue tage tu ulukile aataambi jamue jOombimbeli.

Gumue guomaataambi jotango oje muene guoshilongo shaandonga, omukuaniilua Eino Johannes Namene. Omukuluntutumua Birger Eriksson okua ji kOkaloko e ke mu pe Ombimbeli je. Mefano ljetu ljetango otatu mono, nkene omukuluntutumua ta gandja embo ndjoka ejapuki kumuene guoshilongo. Otaku monika uo aatumua jamue mboka ja cindikile omukuluntutumua esiku ndjoka. Ngashi otu shi shi, omukuaniilua Eino Johannes okua njanjukilua noonkondo Ombimbeli je.

Mefano etijaali otatu mono omukuaniilua Eino Johannes ta lesa Ombimbeli je. Omujakuli gue omusamane Julius Ngai-kukuete okua kuutumba ponto je nota tala uo membo ljomukuaniilua. Otatu halele omukuaniilua guaandonga a aadike oluindji ngaaka ta lesa oohapu dOmua gaaaua pamue naajakuli je. Oohapu domombimbeli odo da guana okuucila oshigwana, ngashi otadi uucile omuntu kehe.

Kuku Johanna Rautanen okua peua uo Ombimbeli joshindonga esiku tuu ndjoka. Mefano ljetu enene otatu mu mono, nkene ta tala naua embo ndjoka lja longekidua

oomvula odindji kunakusa he, kuku Nakambale Kanene. Omusamane ina pitikilua okumona esiku ndika ljenjanju, ihe omuana okue li mono nokue li njanjukilua. Taleni, nkene a kuata embo lje naua note li tala koombinga adihe, manga ine li pandja a leshe mo. Oje okua tseja naua, nkene oljo oshijimati shuudiginini ouindji uomeitaalo nouomeididimiko.

Mefano ndjoka li li pevi ke pandja ndika otatu mono kuku Johanna Rautanen ta lesa Ombimbeli je. Pamue mokulesha kue ta dimbulukua natango oonkundacana di-

mue e di uuvile maandjauo, manga omusamane he naatumua oojakuauo ja li taa kondjo melundululo. Ngashingeji, oshilonga shauo osha ciki miikaha jaauambo ajehe noomooenjo dauo nokuli.

Omuleshi! Ongoje uo omutaambi gumue guomagano ngaka omanene goohapu da Kalunga. Nge to kuata Ombimbeli joje, oto shi ningi uo nenjanju nohoole? Oto ji lesa aluhe nehamelelo negalikano? Oho ji lesa esiku kehe? Ojo ja diladilua ku Kalunga ji kale emona enene ljaauambo ajehe okuza kaakuanjilua jilongo sigo kaanona aashona.



*Omua kua tumu oohapu de
Di je n'vijuni mbu,
Oohapu do dombili je
Di hokololue tuu.
Ajehe je di uve uo,
Najehe je di itaale uo,
Daa kal' inaadi uvika,
Daa kal' inaadi tsejika,
Oombuanaua,
Onkee pulakena.*

*OJesus Kristus,
Omua ngo,
Kua tum' oohapu de
Ku tseni mba aauambo uo,
Tua kala kokule,
Oshoka e tu hoole uo,
Nokua si peha ljetu uo,
Kua hala, e tu hupice,
Naluhe e tu njunjude.
Omukulili
Okue tu kulile.*

SHITLANGU.

omuna guokombanda

ja njolua
ku
Andre de Clec
na
Edoardo Monanc

Lja
ku
osea Namupala,

Etsikilo.

Uusama ouandje sho inaandi mona nale omutiligane. Onda dimbulukua oshinima sha ningua sho nda li omushona. Aamuameme aakadona jaali, Linda na Vaselina oja icana ndje tu ka talele po kuku. Moondjenda doka inandi mona mo nando uanaua uasha: ondjila ouala ondeendeka nomacimbo genota.

Sho tua ji kokule oja popi kutja oja hala ja ka tale eshina ljokolutenda, shitemela (moshingilisa steamer) tali ende po, onda zimine okuja najo. Oja gueda po kutja:

- Shitlangu, ngele oua vulua otatu kuhumbata. -

Osho tua ji.

Nanzija otua mono olutenda. Olua koklekua nomamanja nolua tentekua kiiti ja shigakana noluo luene ijela taji adima. Sho tua humu ko otua londo kehaufu (ondundu jevi). Sho tue li kondo otua tala naua olutenda. Moku lu tala olua fa luaa nehulilo. Olua za kooha duujuni notalu ji uo kooha oonkuauo. Onda vulua nzija oku lu tala nonda lombuele jakuetu tu je.

- O, tse otua hala okutala ontaula onene sho taji ende po, ndjoka haji kudile, haji nduanduama nohaji zoluici.

Opo ndi mane oohapu onda lili ondjala. Opo mpoka otua tsikile isheue.

Osho tua ciki megumbo lja kuku. Aamuameme mboka oja kala ecimbo alihe taa popi shitimela. Otua li uo tua lombuelua kutja okushuna kuetu okomatango.

Mondjila jokuja kegumbo otue ja polutenda. Otua ende tue lu landula tua kunkula nehaufu. Otua ji momiti diitaji ja lala notua tegelele eshina.

Eshina sho lje ja onda pula!

- Ejamakuti ndjono ohali li aantu? -

- Ihali ljana. -

- Ohali li shike? -

- Ihali li sha. Ohali fike omakala. -

Kanda li ndu uvite ko oshinima shika. Ihe ekudilo ndjoka inaandi li uva nale olja citike ndje omatsi.

- Oshike ano tashindunduma huijaka? -

- Goja ngoje. Oshitimela tali ja. - Osho omumuameme a lombuele ndje.

Onda kala inee fatulukilua naua sigo eshina tali zi ko tali kugu miihua. Opuu li ijhuna sho tali igida notali kudile! Omakudilo agehe gomuuuni kage vule ndjo. Onda tameke okulila nonda faduka po. Aamuameme ja kambadala andola ootu okuicana ndje, ihe sho ijela taji ikuegenjene kumue

notaji eta ekudilo onda kuca omatako kumue nonda ka holama miihua. Aamuameme ja kambadala natango okuhila ndje mo kekuni ihe ngame nda kondjo noonkondo sigo ja si uunje noja shuna ja ka tale eshina nkene tali tsikile isheue.

Evi lja kakama, omakutsi gandje ga citi nonda cicikile.

Sho lja piti onda galuka. Aamuameme oja jolo ndje noja ti:

- Oshimuameme oshimbanda ngiini. -

OMAHEPEKO.

Mokutameka uugundjuka ue Shitlangu okua li e shi okunjanjukilua esimaño ljedi-na lje.

Esiku tate, Mushotana a sa, egumbo olja li lja pijagana. Aantu ja kala moondunda nokulila. Aakiintu je oja li taa ipula mpo taa ka kala, na otaa ka hokanua ku lje.

Meme na kuku oja li aanelago, oshoka aakadona jaamuameme oja li aagundjuka noje shi iilonga jomegumbo.

Ngame ondi niue kaakulukadi mbaka jaali (meme na kuku) okuputuda ndje. Osha guana. Aakadona jaamuameme taa kuaca mpoka pua pumbua ekuaco. Osho uo ezimo lja tokola

Aamuameme aakadona oja diginine iilonga noja tsejika momagumbo ogendji. Oja lukua nokuli aakiintulela. Osho shoka she ja pe uupenda okulongela egumbo. Egumbo ljaandjetu olja njanjukilua iilonga jauo omasiku agehe. Oja li po shili aadiginine iilonga.

- Ka taleni omeja, - taa ji komucima nokuhumbata iijura komitse, ja siikilua niitaji jomafo opo omeja gaa hunge.

Shaa tuu ja galuka ja vulua koondjenda oonde mo omomutenja omululu: - Kuceni po omuhi ngo, nkee tuu gua zi ohela ogua lala ouala. Kamu na tuu onjalo. Indeni nokuli mu ka tse kelugo kaku na uusila! -

- Ombiga pamue taji puine. Omue ji talele tuu? -

- Kaku na omakunde goshigali, nekaka oljo ootuu lja ko. Indeni mu ka mue omboga. -

Omiti ngele tadi tameke okupita notadi holola ocinge, ohadi etele aakadona iilonga:

- Aanona ne, ecimbo oljiilonga Kuceni omatemo geni. -

Komapja ngele kaku na iilonga unene, uunona uomegumbo ou na okulelua. - Kuceni mo okanona ne mu dane nako, - okanona ngele taka lili, otaka tulua kombunda ka kuiinua modikua joshipa nenge jelapi.

Aamuameme osho ja kala ngeji oomvula haa longele aakulukadi oonjamukua-uo ja meme uo. Egumbo ljaandjetu andola olja kala li nuunona u cike peni mbela ando omo ja kalele aluhe (oshoka osho ja ka hokanua).

Tadi tsikilu.

ONDJALULAMASIKU OMO JI LI
NATANGO. JI IKONGELA MBALA
MANGA INAJI PUA MO. -/6

OMIKALO OMIPE OKUNJOLA OSINDONGA.

Omikalo dokunjola oshindonga oda lunduluka nokuli oluindji. Nokuli Nakambale noojakuauo inaa njola petamekolela ngashi ja ka njola komeho. Moomvula dika da hugunina oluhepo luondanda miinjanjangido nomomashina omakuauo gokunjola olue tu ciminike isheue okukonga omikalo omipe. Ihe nadika uo inadi guana. Unene Otu uete pe nuusama, ondanda "d" sho taji longicua ngashingeji okuhclola omaui gata-tu ga jooloka, ngashi miiija "David", "okudiladila", "nokudidilika". Ondanda jetu "c" otaji limbilike aakuilongo mboka ji iigilile oku ji tumbuia ngashi "s" nenge "tsh" nenge "k" nokuli. Ngele isheue to pulakene naua oshitja "ndjoka" momatumbulo "ongombe ndjoka" na "embo ndjoka", oto didilike pe nomaui "ndj" gaali ngoka kage shi kunjolua pamukalo gumue.

Iinima mbika sho ja konakonua kaahongi aasuomi nokaalongi aauambo pamue naakoneki aakuilongo, okua uucua isheue omikalo dimue omipe doka tua hala oku di fatula mpaka ngashingeji. Moku di fatula otatu lundulula uo okunjola kuetu kashona na kashona pamikalo tutu doka.

Mpoka pua njolua "c" otapu ka njolua ngashingeji "th". Ano otatu njola: "Aakiintu otaa thitha koshini."

Mpoka pua njolua "d" miiija joshindongeela, otapu ka njolua ngashingeji ngele "dh" nenge "ndh". Ano natu njole: "Dhildhila u tale!" na: "Kape nomadhidhiliko ga sha."

Miiija iikuiilongo nomomadhina otatu vulu okulongitha uo ondanda "d" ngashi shito. Ano natu njole ngaa: "Adam okua tidhua moparadisa."

Ngashi mu shi uete, omikalo ndhika otadhi lelepeke kashona iitja jetu, ihe kape nambudhi, nando tu ihepeke kashona, shampa tuu tatu, ka njola dha jela.

Konjala apehe mpoka pua njolua "j", otatu ka njola ngashingeji "y". Ondanda "j" otaji ka monika mu "ndj" ajike, oshoka ope nejooloko pokati ka "ndjoka" na "ndyoka", ngashi otatu ka njola: "Ombimbeli ndjoka yandje" ihe "Embo ndyoka lyandje."

Elunduluko ndika olyo enene shili. Kehe gumue otu nokuidheula naua, opo tuua nyole "j" mpoka inayi pumbua.

Ihe pamue elunduluko enene li vule omakuauo agehe olyo ndika: Apehe mpoka pua nyolua "u" ya tetekele ondanda yilue mokatumbulo tuu nkoka (makantoko tuu nkoka), opu nokuyolua ngashingeyi "w". Ano natu nyole: "Omumati okwa kwatwa kokugulu kwe" na: "Aawa nuuwa wawo."

Otu shi shi, ngoka i ilongo okulesha nokunyola pamukalo gumwe, oye ota nyengwa okuya mbala momukalalo omukwawo. Ihe otu shi shi wo, omikalo ndhika omipe otadhi oopalele nawa oshindonga, dho kadhi shi iitotwa yowala, aawe, odho tuu otadhi dhigininwa momalaka ogendji gaambantu.

IHOLELWA YOMUKALO OMUPE GWOKUNYOLA.

Tala nawa iholelwa mbika, yi ku dhimbulukithe natango omukalo omupe gwokunyola oshindonga, ngye u dhimbulule nawa shoka tagu ti. Komukweyo kehe otaku tumbulwa omukalo omukulu. Opo taku tiwa, nkene pu nokunyolwa ngashingeyi. Ohugunina otaku gandywa oshiholelwa nenge iholelwa yi we yomukalo ngoka. Anot:

c	taka nyolwa ngashingeyi	th	(okuthathala)
d	taka vulu okunyolwa	d	(David)
d	taka vulu wo okunyolwa	dh	(uudhudhu)
d	taka vulu wo okunyolwa	ndh	(endhindhiliko)
j	taka nyolwa ngashingeyi	y	(iiyuma yoye)
mbj	tau nyolwa	mby	(okumbyangambyanga)
lj	" "	ly	(okulyalyakana)
mj	" "	my	(okumya)
nj	" "	ny	(enyanyu)
pj	" "	py	(epya)
mpj	" "	mpy	(oompya)
tj	" "	ty	(okutyaya)
ntj	" "	nty	(omantya)
ndj	tau vulu okunyolwa	ndy	(embo ndyoka)
ndj	tau vulu wo okunyolwa	ndj	(ondjimbo ndjoka)
u	taka vulu okunyolwa	u	(okugulu)
u	taka vulu wo okunyolwa	w	(uuwanawa; oluwowolo)

Mpaka otapu landula natango amatumbulo gamwe gomokambo kotango ga nyolwa pamukalo nguka omupe :-

"Delila na Dina oyo aamwayina. Ohaa yalula nohaa nyola pamwe."
 "Mokuti mu nomiti dho oopala. Dimwe dhadho hadhi iimi iiyimai."
 "Oondila odi niibandhila yadho. Oodhi dhika otadhi hepeke iimura."

"Moshikuku sha meme omu noondjuhwa odhindji. Ohadhi vala emayi. Meme a pe ndje onduhwa yimwe. Oyu uutumanene emayi gayo noya tende uuyuhwana owindji. Esiku ndyoka nda nyanyukwa."

"Ngashingeyi Kalunga kwe tu lokithile omvula ombwanawa. Nuumvo tatu mono iipalutha. Kalunga na hambelwe!"

Otwa hala elunduluko ndika li holoke kashona na kashona, opo aantu ayehe ya wape okuiigilila mbyoka iipe. Osho itatu lundulula manga edhina lyoshifo shetu. Nali kale ngaa "Omukuetu". sigo opehulilo lyomumvo nguka. Pamwe omumvo tagu ya otali ka kala "Omukwetu".

Okuza kongashingeyi moshifo kehe otamu ka kala iinyolwa yimwe ya nyolwa

pamukalo nguka omupe, manga iinyolwa iikuawo oyi li pamukalo omukulu. Omwalu gwiinyolwa mbika yopamukalo omupe otagu ki indjipala moshifo kehe, sigo pehulilo lyomumvo omukalo omukulu tagu vulu okuethiwa.

Omasiku gopopepi otapu nyanyangidwa wo omambo pamukalo nguka omupe

OMAJEGO GAAKUANKALA TAGA KONAKONUA.

Aanandunge oja kuminua aakuankala, oshoka oja je na aluhe omajego ga kola inaga jonuka ngashi omajego gaatiligane haga jonuka nuupu. Aanandunge jamue oja tameke okudiladila kutja pamue uukolele uomajego gaakuankala otau zi miikulja jauo sho kaji na nando osuuka. Oshinima shika oja hala oku shi koneka naua. Onkee kua diladilua aakuankala jamue ja palucue oomuedi dimue iikulja iitojelela ji nosuuka ojindji. Konima joomuedi doka omajego gauo taga konakonua isheue, ku monike, ngele ga tameke okujonuka.

(Die Burger)

OLUHEPO OTALU ETA UUVU.

Moshifo shoondohtora jokuUnion omua li oshinjolua shimue tashi popi omavu ngoka haga dipaga aantu jomaludi gi ili nogi ili muUnion. Omavu gombinzi nuuvu ua "kanker" (oshitumbuka oshiuinaji nenge odija) otaga dipaga gaatiligane ojendji, manga uuvu uepunga nomavu gomomandja taga dipaga aantu jomaludi galue. Ejolo ndika otali zi peni? Omunjoli ta ti, ejoloko ndjoka itali zi moludi luaantu, aaue, otali zi monkalelo jauo. Omavu ngoka haga etele aabantu noombastera eso ogo omavu gaanaluhepo. Onkee ano okukondjica oluhepo ndoka otaku kondjele uo uundjolouele uaantu mboka.

AAKUAMUHAMED OJE TONDE UUKRISTE.

Oshilongo oshinene sha Nigeria mu Afrika jokuuninginino osha mono nuumvo eipangelo. Musho omu naakuamuhamed ojendji. Ojo oja hala pu gandjue ipango mbika itano jokukelela etumo ljaakriste:

1. Itaku pitikua ku ningué omalongelo-kalunga moongerki nenge pondje.
2. Miipangelo moka mu naakuamuhamed inamu longua uukriste.
3. Aanaskola aakuamuhamedi inaa longua uukriste.
4. Mookamba daanuulepera moka mu naakuamuhamed inamu longua uukriste.
5. Aatumua itaa pitikua okutalela po aakuamuhamed momagumbo gauo, je ja tedululice.

Ando tu galikanene oshilonga shetumo kuNigeria, shaa tsikue uudigu koompango da tja ngaaka, tse tu galikanene uo aakuamuhamed mboka aadigu, ji itedulule jo ji itaale Omua Kristus Omukulili gauo,

Otse sho tu noompito oombuanaua okulongela Kalunga, inatu eceni ecimbo li tu pitilile po.

IIFUNDJA JOONGANGA.

Aatokoli joohapu aanene jokuKaap oja pangula omasiku ngaka onganga ndjoka ja jugu omulumentu omuluude £25 niifundja jajo jouala.

Omulongi guokooskepa Ntembe Xhegwana okua li u uuvite uuvu nokua ka kongu ekuaco konganga omuzulu Zeblon Mizeka, Onganga oja ti oji noshiitalelo oshiuanaua tashi holola omuntu ngoka a hala okudipaga Ntembe. Aniuu otashi pula £25. Ntembe okua zimine nokua futu £25. Onganga oje mu etele ekende lja gonjenua mokalapi okatokele. Ntembe okua dimbulula ekende ndjoka kali shi ekende ljoshiitalelo, aaue, ekende ljouala ljokuzilila nando omeja. Onganga oja lombuele Ntembe a tse ekende ndjoka nomuele gue. Ihe shoka Ntembe ina ulukilua mekende efano ljomutondi gue, ngashi okua li e shi uuvanelua, onkee oje a fala oohapu dauo kaatokoli.

Ketokolo onganga ja kambadala natango okuipopila noja lombuele aatokoli kutja ekende ljajo lja kanica aniuu oonkondo daljo oja sho ja zi naljo kuNatal noje li etele kuKaap. Ihe aatokoli oje ji pe uusama noje ji tula mondolongo, oshoka oja oja kotokele aantu noje ja jugu iimaliua jauo.

AAZULU TAA MONO ELUNDULULO EPE LJOMBIMBELI.

Ombimbeli ajihe oja lundululua naale melaka ljaazulu, ihe elundululo ndjoka inali talua ue lja guaua. Onkee kua longekidua elundululo epe. Etestamenti Epe olja njanjangidua nokuli, Etestamenti Ekulu olja lundululua uo ngashingeyi komuhongi omusweden Olof Sarndal ngoka a li a jakula uo melundululo ljeestamenti Epe. Ehangnombimbeli ljokuBritania noljokilongo otali njanjangidica omambo ngoka agehe.

(Sapa)

OONKUNDANA DHOKEPANGELO-NGERKI.

Uusiku ueti-13 lya november ongerka yokOniimuandi ya pi po koluaadi. Ombepo ondhigu sho ja zi kuumbugantu, oya umbile omulilo ngoka kongulu yoshipangelo no koshinyangagongalo nokelimba lyiinima yaanongeki yokagumbo, adhihe no dha pi po. Omambo gegongalo ga hupu ngaa, Kalunga na hambelelwe, ihe iinima yilwe ya pi po.

Onke epangelongerki lya utha momagongalo agehe mu ningwe ongallo esiku eti-22 lya yanuari 1956 yokukwatha egongalo lyokOniimuandi mokutungulula ongerka yauo.

Epangelongerki olya tokola omuhongi Elias Pentti a taambe uutonafelishitayingengerki shomOndonga, nomusitagongalo Pinehas Kambonde a kale omuyakulitonafelishitayingengerki mOndonga, nomuhongi Alpo Hukka a kale omutonafelishitayingengerki shokUuninginino okuza kesiku 1/1'56. - Ngoka a kala nale omuyakulitonafelishitayingengerki shomOndonga, Leonard Auala, ota yi, Kalunga ngele e shi hala, ku Port Elizabeth a ka tsikile okulungua.

Aalongwasitagongalo sho ya konakonua kepangelongerki, Yohannes Nantinda na Tomas Tuutaleni oya ziminia ya ka yapu ilwe muusitagongalo, opo ya ka yakule kOshigambo nokEngela peha lya Matia Kristian na Yason Amakutuwa mboka ya uthua ya ye ku Natal ya ka tsikile okulungwa. Eyapuld lya Yohannes Nantinda na Tomas Tuutaleni tali ningua, Kalunga ngele e shi hala, kOshigambo eti-12/1'56.

Mboka ya yile koshigongi shaakwaluteri yomuAfrika alihe, ku Marangu mu Tanganyika, oya galukile mOwambo eti-7 lya desember. Oye tu etele ekundo lyoshigong shaakwaluteri sha kundulooongerki adhih-oonkwaluteri noya hokolola nkene ya dhimbulula moshigongi shiyaka uukumwe wo-itaali, noya dhimbulula wo nkene ongerk yetu kayi li pondje yoonkwawo ihe oyi li mumwe naakwaluteri ayehe.

Epangelongerki lya tokola omusitagongalo Timoteus ya Andreas a ning- omutumwa gwongerki yetu koshigongi shoongerki dhomomukanka guukwaluteri tashi ka gongala ku Johannesburg eti-10 lya february 1956.

- Ngele ta adhika komaimbo, nene omusitagongalo Leonard Auala na kale omu eha gwe.

Aaevangeliste yokUushimba sho ya fa taa pumbua oshigongi shokutsathana omukumo, ope nokutalua ngele ye shi kuningilw- oshigongi peha lyontumba mewiliko lyomukuntutumuwa B.Eriksson nomusitagongalo Timoteus ya Andeas moluendo lwawo lwokuya koshigongi shoongerki dhomomukanka guukualuteri.

Ku Union sho kwa zi oshifo shaakwaluteri "Credo" (tashi ti: Ndi itaala), iifo iitatu ayike manga, epangelongerki olya tokola yi endithue miitayingengerki palandulathano lya shangwa kombanda yoshifo. Oshifo shoshitayingengerki shOndonga nashi ka thike wo kOkavango. Aasitagongalo naanongeki, ngele ya hokwa ekwatho ndyoka lyomoshifo "Credo" naa inyolithe komusamane A. Hukka, ku Elim, opo kehe ngoka a ka more iifo iyyaali momumvo tagu ya. Oshifo kehe tashi futwa 1/-; ano kunwe 2/- momumvo.



mOnjaanja:

Anna Imene a si 23. 1. 55.
Mateus Lasarus a si 24. 1. 55.
Rosalia Ivula a si 13. 2. 55.
Martta Johannes a si 26. 2. 55.
Nikodemus Efraim a si 14. 3. 55.
Kaarina Ambambi a si 21. 5. 55.
Filemon Mbango a si 18. 5. 55.
Mateus Emvula a si 30. 7. 55.
Jakobina Amutse a si 8. 8. 55.
David Johannes a si 15. 9. 55.
Filemon Mateus a si 16. 9. 55.
Ester Kanjute a si 16. 9. 55.
Kaarina Aksel a si 25. 9. 55.
Jakobina Angula a si 4. 10. 55.
Paulus Tobias a si 7. 10. 55.
Tomas Nankali a si 29. 7. 55.
Hilma Jason a si 19. 10. 55.
David Shikomba a si 14. 10. 55.
Viktoria Matias a si ? ? 55.
Lzevi Filemon a si 31. 10. 55.
Simeon Angombe a si 10. 11. 55.
Abner Timoteus a si 13. 11. 55.
Vilho David a si 29. 11. 55.

mOniipa:

Martta Namupala a si 22. 8. 55.
Tomas Onesimus a si 3. 10. 55.
Edvard Johannes a si 7. 10. 55.
Ester Job a si 13. 10. 55.
Josef Nangolo Tomas a si 3. 11. 55.
Anna Uushona a si 9. 11. 55.

mOshakati:

Jeremia Nambala a si 4. 1. 55.
Johannes Petrus a si 11. 1. 55.
Laimi Uushona a si 12. 1. 55.
Hanna Ananias a si 21. 9. 55.

EGALIKANO LJOMUVU.

Omuua, kuaca ndje muuvu mbu uunene, u talaleke ndje metongo ndika Te njengua kuaca na ue omukuaci. Ongo' auike tuu ndi iinekela. Ongoje nd' iinekela.

Kungoj' te kugu nokugalikana, u pe ndj' efudico molutu nduka lua hepa naji kuuehame, nomuenjo gua nangekua komaiuvo, gua nanga komaiuvo.

Ngel' ito aaluda ndje ue kolutu, kuca ndj' uumbanda uokutila eso, pu kal' enjanju peso ljangje nehambelelo 'ku ku hambelela, oku ku hambelela.

No nge to pe ndj' isheu' uundjolouele, noonkondo domuenjo uo di pa ndje, ndi diginine mepja ljoje iilonga mbjoka ngoje ue ji pa ndje, ombjoka ue ji pa ndje.

(Mel. "Omuaa a hala ngoje u ka gunde,")
Da totua ku Naftali Iindongo.

MBUDIRUHODI.

Mokuzuva mbudiruhodi ezi, kapi, nina hara kumuena. Nina hara kuujunga ko juma.

Momvura 1954 tuna piti moseminari na mukuetu Jafet Karujeva. Mokukara kuetu moskora tuna lirongo naua, dogoro tuna piti. Eharo lietu ilio olio ngaho tuka ronge vanavazinjetu kudiva Hompa Karunga ketu. Imo sina ninki Karunga ana tu guanesere eharo lietu.

Kuliharuka nje 20. 11. 1955 mukuetu Jafet Karujeva ana hulisa rugendo ruendi kontunda zevu, moudinkantu uonomvura 25 1/2 Tara ko, mudinkantu ogu kua kere mudameki nomupenda mosirugana sendi sourongi.

Ntantani tatu tanta nje ngapi? Ameasi simue selike iso esi, eharo lia Karunga nonompangera dendi dakora ado kapi adi rupduruka. Eharo lia Karunga ure nomaharo getu.

Vakriste vakuetu tu lirongeni nondunge ose tu lipe majere. Tu diuorokeni asi kontunda zevu kapi iko kountungi, aue, nje neguru mua Tate Karunga imo mouatungi uetu uokupukura. Heb. 13:14.

Mudiru gokufana ngesi, nove name guna tu ndindire hena, tu gu lirongikidire ntantani.

Natanael Shirongo.

KAATOTI JOMAIMBILO.

Maaambo jamue omua penduka ehalo euanaua okutota omaimbilo nenge iiteuo joshingolo melaka ljauo. Jaloo, osho tuu sha halika. Okukuaca aakambadali mboka otua hala tu tumbule mpaka pafupielela iipango iinene mbjoka omutoti e noku ji diginina, opo oshiteuo nenge eimbilo li kale ljo oopala. Ojo ji li po itatu:

(1) Omuntu e nokudiginina omualu guutumbulo (guuntoko) momukuejo kehe, opo ooverse adihe di kale da facana.

(2) Omuntu e nokutonatela omadenngo geimbilo, opo ga tse kumue nomadenngo gelaka, nge tali popiua.

(3) Omuntu e nokuhulica omikuejo niitja mbjoka ja facana naua pampango jiiteuo.

Moshifo shika otamu holoka "Egalikano ljomuvu." Muljo mua digininua naua omijalu duutumbulo, nomadenngo oge li uo pomaha go oopala. Ihe omahulico gomikuejo omutoti a fa ina jelekela nokuli oku ga facanica. Nando ngeji otua njanjangidica eimbilo ndika omoluoondunge daljo do oopala. Unene eimbilo ndika ngele tali imbua, omahulico ngoka itaga kudile naji aapulakeni.

Tu kuaceni omaimbilo go oopala ngoka ga guanica iipango ajihe itatu:

"Omukuetu".